



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH», broj: 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH», broj: 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08 i 5/22), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU HRVATSKOG NACIONALNOG POMAKA

Broj: 03-07-6-793/21
Sarajevo, 18.11.2022. godine

SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	4
Predmet pregleda i kontrole.....	4
Cilj pregleda i kontrole	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1.NALAZI.....	5
5.2. PREPORUKE.....	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatskog nacionalnog pomaka za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2020. godinu, utvrđeno je da je Hrvatski nacionalni pomak prekršio odredbe člana 4. stav (1), člana 5. stav (4), člana 8. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatskog nacionalnog pomaka za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Hrvatski nacionalni pomak se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	3.400,00	18,01
3.	Prilozi pravnih lica (3-b)	10.000,00	52,97
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	5.478,00	29,02
8.	Prihodi od propagande (3-g)	0,00	0,00
I	Ukupni prihodi (1-8)	18.878,00	100,00
II	Ostali prihodi i drugo	0,19	0,00
	Izvori finansiranja (I+II)	18.878,19	100,00

U godišnjem finansijskom izvještaju za 2020. godinu politička stranka iskazala je rashode u iznosu od 9.515,00 KM.

2. PREDSTAVLJANJE POLITIČKE STRANKE

Naziv političke stranke je Hrvatski nacionalni pomak. Skraćeni naziv je HNP.

Politička stranka Hrvatski nacionalni pomak upisana je u registar kod Općinskog suda u Livnu, Rješenjem broj: 068-0-F1-20-000 002 od 10.06.2020. godine.

Sjedište političke stranke je u Tomislavgradu, Trg dr Franje Tuđmana bb.

Lica ovlaštena za zastupanje stranke su: Ivan Vukadin, predsjednik i Ante Tadić, tajnik.

Lice ovlašteno za podnošenje finansijskih izvještaja za 2020. godinu je Ante Tadić.

Prema podacima iz godišnjeg finansijskog izvještaja za 2020. godinu, Hrvatski nacionalni pomak ima sljedeću organizacionu strukturu:

- Središnjica.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatskog nacionalnog pomaka za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja Hrvatskog nacionalnog pomaka obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Pregled i kontrola finansijskih izvještaja obavlja se prvi put.

5. NALAZI I PREPORUKE

5.1. NALAZI

a) Hrvatski nacionalni pomak prekršio je odredbe člana 4. stav (1) Zakona o finansiranju političkih stranaka¹.

U godišnjem finansijskom izvještaju za 2020. godinu Hrvatski nacionalni pomak iskazao je ukupne rashode u iznosu od 9.515,00 KM.

Hrvatski nacionalni pomak je uz dodatnu dokumentaciju za 2020. godinu, dana 09.11.2021. godine, Centralnoj izbornoj komisiji Bosne i Hercegovine dostavio Program utroška sredstava za 2020. godinu bez broja i datuma usvajanja.

S obzirom da Hrvatski nacionalni pomak nije dostavio program utroška sredstava za 2020. godinu neposredno nakon njegovog usvajanja, smatramo da je finansijska sredstva utrošio bez programa utroška sredstava za 2020. godinu, čime je prekršio odredbe člana 4. stav (1) Zakona o finansiranju političkih stranaka.

b) Hrvatski nacionalni pomak prekršio je odredbe člana 5. stav (4) i člana 8. stav (1) Zakona o finansiranju političkih stranaka.

- Hrvatski nacionalni pomak nije u godišnjem finansijskom izvještaju prijavio nenovčanu donaciju Kulturno-informativnog centra u iznosu od 50,00 KM, čime je prekršio odredbe člana 5. stav (4) Zakona o finansiranju političkih stranaka.

Kontrolom računa za troškove izborne kampanje utvrđeno je da je Hrvatski nacionalni pomak koristio usluge oglašavanja na video zidu Kulturno-informativnog centra u Tomislavgradu u periodu od 23.10.2020. godine do 13.11.2020. godine. Kulturno-informativni centar je za izvršene usluge stranci ispostavio račun broj: 5/2020 od 24.11.2020. godine u kojem je navedeno da je usluga iznosila 400,00 KM, popust 50,00 KM, odnosno ukupan iznos računa 350,00 KM.

S obzirom da politička stranka nije imala obavezu da plati 50,00 KM, ostvarila je nenovčanu donaciju Kulturno-informativnog centra, koju je imala obavezu da evidentira u svojim poslovnim knjigama i iskaže u godišnjem finansijskom izvještaju.

Imajući u vidu da je Kulturno-informativni centar javna ustanova za kulturu, prekršene su i odredbe člana 8. stav (1) Zakona o finansiranju političkih stranaka.

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

- Hrvatski nacionalni pomak nije u godišnjem finansijskom izvještaju prijavio priloge 11 fizičkih lica u iznosima od po 498,00 KM², čime je prekršio odredbe člana 5. stav (4) Zakona o finansiranju političkih stranaka.

c) Hrvatski nacionalni pomak prekršio je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu pregleda godišnjeg finansijskog izvještaja, utvrđeno je da politička stranka nije vodila poslovne knjige u skladu sa računovodstvenim propisima, nije vodila potpune evidencije o prihodima, rashodima i obavezama i nije podnijela finansijski izvještaj u skladu sa Pravilnikom o godišnjim finansijskim izvještajima političkih stranaka („Službeni glasnik BiH” br. 96/13 i 89/16)-u daljem tekstu: Pravilnik, čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

(1) Hrvatski nacionalni pomak nije u godišnjem finansijskom izvještaju iskazao jedan transakcijski račun i nije iskazao tačne podatke o prometu i saldu na drugom transakcijskom računu, čime je prekršio odredbe člana 11. Pravilnika.

- Stranka u obrascu 2 (pregled prometa svih transakcijskih računa političke stranke) godišnjeg finansijskog izvještaja nije iskazala transakcijski račun broj: 3382302273664049 kod UniCredit bank d.d.

Kontrolom izvoda sa navedenog računa, utvrđeno je da je ukupan promet ulaza iznosio 13.400,13 KM, ukupan promet izlaza 7.161,40 KM, a stanje na dan 31.12.2020. godine 6.238,73 KM.

- U obrascu 2 godišnjeg finansijskog izvještaja iskazan je transakcijski račun broj: 3382302273663176 kod UniCredit bank d.d. sa sljedećim podacima: ukupan promet ulaza u iznosu od 18.878,19 KM, ukupan promet izlaza u iznosu od 11.020,60 KM i stanje na dan 31.12.2020. godine u iznosu od 7.857,59 KM.

Uvidom u izvode sa transakcijskog račun broj: 3382302273663176, utvrđeno je sljedeće: ukupan promet ulaza u iznosu od 5.478,06 KM, ukupan promet izlaza u iznosu od 3.859,20 KM i stanje na dan 31.12.2020. godine u iznosu od 1.618,86 KM.

(2) Kontrolom izvoda sa transakcijskog računa stranke, utvrđeno je da su na ovaj račun uplaćena sredstava iz budžeta Općine Tomislavgrad u ukupnom iznosu 5.478,00 KM.

Na osnovu podataka koje je dostavila Općina Tomislavgrad utvrđeno je da su sredstva uplaćena stranci na osnovu izjava 11 samostalnih vijećnika Općinskom vijeću Tomislavgrad za period od avgusta do oktobra 2020. godine. Uvidom u pojedinačne izjave utvrđeno je da su vijećnici obavijestili Općinsko vijeće Tomislavgrad da se sredstva koja im pripadaju uplaćuju na transakcijski račun Hrvatskog nacionalnog pomaka.

Na osnovu navedenog, utvrđeno je da su fizička lica-vijećnici Ivana Dodig, Anita Grgić, Anamarija Galir, Milica Skočibušić, Ante Bokanović, Ante Kutleša, Ante Vukadin, Ante Đikić, Luka Krstanović, Pero Ivić i Josip Bagarić političkoj stranci Hrvatski nacionalni pomak dali priloge u iznosima od po 498,00 KM, odnosno ukupno 5.478,00 KM.

Stranka je navedena sredstva iskazala kao prihode iz budžeta Općine Tomislavgrad, čime je prekršila odredbe člana 13, 14. i 19. Pravilnika.

(3) Stranka nije u poslovnim knjigama evidentirala i u godišnjem finansijskom izvještaju iskazala nenovčanu donaciju Kulturno-informativnog centra u Tomislavgradu u iznosu od 50,00 KM, te

² Detaljnije u nalazu pod c) stav (2).

je troškove izborne kampanje iskazala u manjem iznosu za 50,00 KM u odnosu na ostvarene, čime je prekršila odredbe člana 13, 18, 21. i 23. Pravilnika.

- (4) Stranka nije u poslovnim knjigama evidentirala i u godišnjem finansijskom izvještaju iskazala troškove zakupa poslovnog prostora i obaveze prema zakupodavcu, čime je prekršila odredbe člana 21, 22. i 24. Pravilnika.

Uvidom u Ugovor o zakupu poslovnog prostora koji je zaključen između Hrvatskog nacionalnog pomaka i fizičkog lica Ante Andrića, utvrđeno je da je stranka od 18.06.2020. godine koristila poslovni prostor, površine 48,78 m², po cijeni od 50,00 KM mjesečno, odnosno 300,00 KM za šest mjeseci 2020. godinu.

- (5) U godišnjem finansijskom izvještaju stranka je troškove izborne kampanje iskazala u obrascu 4.1 (režijsko-administrativni i ostali troškovi), čime je prekršila odredbe člana 21, 22. i 23. Pravilnika.

- (6) U obrascu 3-b (prilozi pravnih lica) godišnjeg finansijskog izvještaja stranka nije navela tačne podatke o nazivu donatora, čime je prekršila odredbe člana 15. Pravilnika.

Stranka je u obrascu 3-b navela da je pravno lice „Farma Glamoč“ d.o.o. dala dva priloga u iznosima od po 2.500,00 KM, odnosno ukupno 5.000,00 KM. Uvidom u izvode sa transakcijskog računa stranke i izdate potvrde o primljenim priložima, utvrđeno je da je „Farma Glamoč“ d.o.o. dala prilog stranci u iznosu od 2.500,00 KM, dok je pravno lice „Farma Tomislavgrad“ d.o.o. Tomislavgrad dala prilog stranci u iznosu od 2.500,00 KM.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM³ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Hrvatski nacionalni pomak je u svrhu izborne kampanje za Lokalne izbore 2020. godine mogao da potroši sredstva u iznosu od 9.235,80 KM.

Hrvatski nacionalni pomak je u godišnjem finansijskom izvještaju za 2020. godinu iskazao troškove izborne kampanje u iznosu od 4.844,00 KM.

5.2. PREPORUKE

Preporučuje se političkoj stranci Hrvatski nacionalni pomak da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da finansijska sredstva obezbijedena za finansiranje stranke koristi u skladu sa utvrđenim programom utroška sredstava,***
- ***da vodi evidencije o priložima,***
- ***da se ne finansira iz zabranjenih izvora,***
- ***da poslovne knjige vodi u skladu sa računovodstvenim propisima, odnosno da vodi potpune evidencije o prihodima, rashodima i obavezama, i***

³ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa odredbama Pravilnika o godišnjim finansijskim izvještajima političkih stranaka.*

KOMENTAR:

U ostavljenom roku, Hrvatski nacionalni pomak nije dostavio primjedbe na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2020. godinu.

Šef Odsjeka za revizijske poslove, revizor

Sanja Tošović

Šef Službe za reviziju

Mr.sc. Hasida Gušić